

Uunga siunnersuut Nalunaaquttap aalajangersarneqarnera pillugu Inatsisartut inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Inatsisartunut ilaasortaq Qupanuk Olsen, Naleraq)

(Siullermeerneqarnera)

Uunga siunnersuut Nalunaaquttap aalajangersarneqarnera pillugu inatsisaata allanngortinneqarneranik Inatsisartut inatsisaat (Nalunaaquttat ingerlaqatigiiffiannut allamut ikaarsaarneq, aasaanerani nalunaaquttap atorunnaarsinneqarnera)

(Siumut)

(Siullermeerneqarnera)

Qujanaq Siumut aamma Naleraq siunnersuut una saqqummiukkassiuk.

Siunnersuutit assigiit assigiinnik oqariartuutillit. Marlunnik pingaarutilinnik imallit:

1. Nalunaaquttat ingerlaqatigiiffiannut allanngortitsineq, aaqqissuussamut martsimi 2023-imi qimatatsinnut, uterluni

2. Aasaanerani nalunaaquttap atorunnaarsinneqarnera.

Aasaanerani nalunaaqutaq siulliuteriarlara. Demokraatinut ersarippoq, aallaavittut aaqqissuussap taassuma atorunnaarnissaa kissaatigigipput. Takusinnaanngilarput nalunaaquttap ukiumut marloriarluni siuartillunilu kinguartinnissaa sumut isumaqarnerisq. Ammavorli, siunissami maannakkut aasaanerani nalunaaqutaq atortagarput- imaluunniit ukiuunerani nalunaaqutaq atortagarput aallaavigissaneripput. Tamanna sukumiisumik misissortariaqarpoq aamma nunanut allanut sunniinissaa, pitsaanerpaamik suleqatigiinneq niueqatigiinnerlu qulakkeerniassagatsigu.

Paasinnittaaserput malillugu tulluarnersuaq, EU-p tassunga isummernera malikkutsigu.

Nassuerutigisariaqarparpullu, EU-mi suliap ingerlanera paasiuminaatsuummat, aammalu nunat ilaasortaasut isumaqatigiinniarnarat ajornakusoorat. Taamaattumik pingaartuuvoq, EU-mi aallartitatta pisumik malinnaalluarnissaaq ersarissumillu naliliilluni, qanoq isikkoqartoqarnerisq.

Ungasissorsuunngitsukku EU-mi aaqqiissutaasussamik nassaartoqarsimanngipput, eqqarsaatigisariaqarparput, uagut nammineerluta siuttuusariaqarnerput. Aalajangernerli taamaattoq aatsaat pissaaq maani nunatsinni inuussutissarsiortut sukumiisumik oqaloqatigeqqaarlugit, aningaasatigut kingunissai ilisimaniassagatsigit.



DEMOKRAATIT

Nalunaaquttat ingerlaqatigiiffiannut uteqqinnissamut apeqqut pineqartillugu, takusinnaavarput, isummat assigiinngitsuusut. Ataqqivagut innuttaasut, atsiornernik katersinermikkut assigisaatigullu naammagittaalliornerminnik takutitsisimasut. Taakku isumaat soorunami tusarnaassavagut. Tassungali ilutigalugu Demokraatinut pingaarneruvoq, inuiaqatigiit ima ilusilersornissaat, inuussutissarsiortut pitsaanerpaamik atugaqartillugit. Inuussutissarsiortut nukittuut pigissaarnermut, atugarissaarnermut naggataatigullu nammineernerulernermut tunngavissisussaapput. Maluginiarparputtaaq, inuussutissarsiortunit tusarniaarnermut akissutini assigiingajammik nalunaaquttat ingerlaqatigiiffiannik allanngortitseqqinnissaq pitsaanngitsumik kinguneqartussatut tikkuartorneqarmat. Assersuutigalugu Air Greenland-ip tikkuarpaa, uteqqinneq nunatsinni timmisartortitseqatigiiffimmut annertuunik milioonilikkaanik akeqassasoq. Tassungalu ilutigalugu tikkuarneqarpoq, timmisartup aqutugisartagassaanik nutaanik pissarsiniarneq ajornakusuulersinnaasoq, tamannalu takornariaqarnermut tamarmut pitsaanngitsumik annertuumik kingunerlussinnaasoq.

Taamaattumik uagut Demokraatiniit isumaqarpugut, aalajangernissamut tunngavissat naammanngitsut. Siunnersuutit innuttaasunit saaffiginnissutinit aallaaveqarnerorpasipput, tamannalu paasilluarparput, naammatumilli tunngavissanik takutitsinngitsoq. Inatsisartuni sukumiinerusumik nalilersuineramik pisariaqartitsivugut, maannakkumut nalunaaquttap ingerlaarneranut nuunneq sutigut kinguneqarsimanersoq. Nalilersuinermi tassani innuttaasut, inuussutissarsiortut oqartussallu akuutinneqartariaqarput aammalu pitsaaqutit ajoqutaasinnaasullu takutillugit.

Siunnersuutigaarput, nalilersuinissap aaqqissuunneqarnissaanut suliaq piaaernerpaamik aallartinneqassasoq, taamaasilluta uagut Inatsisartuni aalajangiinissaatsinnut pitsaanerusumik tunngavissaqarniassagatta.

Taamatut oqaaseqarlutik Demokraatit siunnersuut akuereqqullugu innersuussutigaat ataatsimiititaliamilu susassaqartumi suliareqqinneqarnissaanik innersuussuteqarlutik.